


PASCUA ISTA  
JESUCRISTO HUAÑUSHA CAUSARISHCAMANDA



PASCUA ISTA

JESUCRISTO HUAÑUSHA CAUSARISHCAMANDA

(Fiesta de la Pascua: La Muerte y Resurrección de Jesucristo)

Diospa Shimira pasachisha yanapajguna:

Mario Cerda

Tomás Grefa

Venancio Cerda

Juanita Shiguango

Dibujaj: Alejandro Grefa

Primera Edición 1.981

Segunda Edición

1.982

700 Ejemplares

I. L. V., Quito, Ecuador

## JESUS JERUSALEMBI ICUN

Jesusmi tucui mundu runauna uchara aparisha shu cruspi turmin-darisha huañuca. Huañushca huasha quinsa punzha huashai cuti causarica. Caran huatai Jesús caita rashcara Pascua nishca istara iyarisha charinchi.

Jesús, Diospa churi, pai huañuna uras pactaushcai Jerusalemma riuca paihua chungu ishqui yachachisca runaunaundi. Shu llactamanda shu llactagama Israel nishca allpai purinauca. Shina riushcai, Jesús runaunara camachica, mana raihuaj samira Diospa churi ashcamanda rarca. Paimi tucui unguignara alichica, supairas runamanda llucchisha cachaca, huañushcaunaras causachica.

Shuj punzhai Jesús paigunara nica: Ña Jerusalemma riunchi. Runa Churi (Jesús nishca) piñaujguna maquii entregashca tucungaraun. Paiguna Runa Churira huañuchinaungami, azutisha, chacatasha. Astaumbas quinsa punzhai causarishami. Shina Jesús rimajllaira paita catijguna mana imaras intindinaucachu imara pai rimaushcaras.

Jesús Jerusalemma mayanllayaushcai Betfagé nishca ichilla llactama pactamunauca. Olivos nishca urcu mayambi tianauca. Jesús pai yachachishca ishqui runaunara chi llactama cachaca. Shina cachasha paigunara nica: Richi chimbai tiaj ichilla llactama. Chibi shu huatashca burura tupanguichimi. Maican runas paihua ahuai charaj mana pis tiarishcachu anga. Tupasha burura pascasha apamuichi. Pihuas shina cangunara tapujpiga: Ima rangajta shina ranguchi? casna nisha cutipanguichi: Señormi caita ministin, nisha.



Paiguna Jesús rimashcasna burura tupanauca. Pactasha huatashcara pascanauca. Pascashcara ricusha huaquin chibi tiauj runauna tapanauca nisha: Ima rangajta pascasha apaunguichiri? nisha.

Cutipasha ninauca Jesús rimashcasna cuintanauca nisha: Señormi caita ministin. Shina rimashca huasha burura ña Jesusma apamunauca. Paiguna charishca llachapara buru ahuai churanauca.

Jesús buru ahuai tiarishca huasha ña Jerusalemma ringaj callarica. Chi punzhaunai judiogunaj Pascua nishca atun istami aca. Imasnara paiguna Diosmanda iyarisha tianauca Egipto nishca llactai causaj mili apu maquimanda llucchi tucushcamanda. Shinajpi ashca runauna Jerusalemma shamunauca. Jesushua pariju tiauj runaunaga Lazaro huañushcamanda cuti causachishcara ricusha tianauca randi huaquinguna caita cuintashcallara uyasha huaquin runauna Jesuspajma shamunauca imara raushcaras ricungaj. Jesús Jerusalemma shamunara uyasha ashca runauna paita tupangaj rinauca.

Maicans, Jesusta apumi, nisha balichisha ahuyachinauca. Runauna pai pasaushcai llachapaunara ñambii mandanauca, paiguna shu atun rey apu llactama icushca cuinta ranauca. Tucui caiguna shina tucuca Diosmanda rimashca shimi pactaringaj.

Pai casna nishca: Jerusalem llactara rimaichi. Ama manzhanguichichu. Ricui, nisha, cambia rey apu cangunama shamun, mansu burui tiarisha.

Ñau pa riucunas, huasha shamuujgunas casna nisha caparinauca  
Jesusta ricusha: Alabashca angui Davidpa churi. Bindiciashcami  
Señorba shutii shamujta. Alabashca angui ahua pachais.

Shinajpi ashca runauna Jesusta ricungaj shamunauca.

Maicans fariseo runauna anauca, paiguna Jesushua contra shamunauca.  
Chi raigumanda ashcauna Jesusta alabashcara ricusha fariseo nishca  
runauna paigunapura cuintarisha tianauca. Uyai, nisha, mana imaras  
Jesusta contra rangaj ushanchichu yachin.

Fariseo nishca muntunmanda Jesusta rimaca: Yachachij, camba  
yachachishca runaunara piñai nisha, ama caparishcahua alabanauchu.

Jesus cutipaca: Paiguna ñucara mana alabajpiga rumiuna shinzhira  
caparisha ñucara alabanaungami.

Jesús Jerusalen llactama mayanllayaushcai llactara ricusha ashcara  
llaquirisha huacaca: Ñuca cushiras ganastas cangunama cunara munajllaira,  
ñuca Dios ashcara cangunahua tiaushcaras mana yachasha mana ricsihua-  
canguichi. Ciertu punzhauna cangunajpi llaqui pactamungami Dios canguna-  
hua tiaushcara canguna mana sintishca raigumanda.

Chi shimira rimashca huasha Jesús Jerusalenma icuca. Icuypi  
intiru llactai tiauj runauna ashcara turbaringaj callarinauca.

Maican runa: Caiga, pitangai? nisha tapunauca.

Maican runa: Caiga Diosmanda rimaj Jesusmi nisha rimanauca.

Jesús Diosta alabana templo nishca huasii icusha caran partima  
ricusha llucshisha rica.

Cayandi punzhai Jesus cuti templo huasi ucuma icushcai chibi ashca catujgunara randiujgunaras tianauca. Jesús chita ricusha tucui paigunara canzhama callpachica. Maspas cullqui turcana mesaunara voltiachica paigunaras shinallara callpachica.

Jesús paigunara nica: Diospa shimi quillcashcami tian: Nuca huasi shu Diosta mañana huasimi, randi cangunaga shu shuhuaiguna huasira quinta rashcanguichi.

Templo huasi ucui ñausa runa, suchu runas Jesusma shamunauca. Paigunara Jesús alichica.

Huahuauna templo huasi ucui caparinauca nisha: Nucanchi Quishpichij Davidpa Churimi. Shina alabasha caparishcara uyasha sacerdote nishca, yachachijgunas mana ansas gustanaucachu.

Sacerdote nishca mili apuuna Jesusta piñashcahua rimanauca: Manzhu uyangui huahuauna rimashcara?

Jesús paigunara cutipasha nica: Ari, yani. Manzhu ima uraspas ricushcanguichi Diospa shimii rimashcara? Huahuauna shimimanda alabashcara Yaya Dios apingami.

Shina ajllaira sacerdote apuuna escribas nishca yachachijgunandi, judiogunaj apunandi, Jesusta ima tunui rashara paita huañuchinanga nisha mascanauca. Chi ratui mana imaras ranara ushanaucachu Jesusta huañuchingaj, runauna ashca munaihua paita uyanara munashcamanda. Apuuna Jesusta yapa manzanauca runauna Jesús yachachishcara yapa munashcamanda. Chi raigu apuuna mana imaras ranara ushanaucachu.

JESUS JERUSALEMBI ICUN TAPUNAUNA

*Cai tapunara quilleasha cutipanguí.*

*Panga 3 cai cutipanara tupanguimi.*

1. Jesús pihua uchamandara cruspi huañuca?
2. Jesús pai huañuna pactariushcai maimara rica?
3. Jesusga ishqui runara imara apangajta cachaca?

*Panga 5 cai cutipanara tupanguimi.*

4. Imacta pangaunara nambii mandanauca?

*Panga 6 cai cutipanara tupanguimi.*

5. Jesusta ricusha imasna nishara caparinauca?
6. Fariseos muntunmanda Jesusta imara rimanauca?
7. Shina nijpi Jesus imasna nishara cutipaca?
8. Jesús mayanyaushcai Jerusalenma ricusha imara rarca?

*Panga 7 cai cutipanara cutipanguimi.*

9. Jesús templo huasima icusha imara rarca?
10. Callpachishca huasha Jesús paigunara imara nica?
11. Huahuaunara templo ucui imasna nishara caparinauca?
12. Jesús templo huasi ucui chara camachisha tiaushcai sacerdote apuuna imara rangaj munanauca?
13. Ima raigura apuuna mana imaras ranara ushanauca?



## SANTA CENAMANDA

Jesús paihua yachachishca runaunandi Jerusalembi tiaushcai Pascua ista pactaca. Judioguna chi Pascua ista punzhai Diosta alabasha sacrificio nishcara rasha ovejara huañuchinauca yahuarda Diosta ricuchingaj. Jesús paihua yachachishca runamanda Juanda, Pedrora shu huasima cachaca. Casna rimanguichi nisha: Richi, Pascua istara puruntuichi ñucanchi parijulla micungaj.

Micunara puruntushca huasha tutayaujpi Jesús paihua yachachishca runaunahua mesai tiarisha paigunara casna nica: Ashcara munashcani cai Pascua istara cangunahua micungaj manara turmindarijllaira.

Chibi micushcai yachachishca runauna pura piñahuanauca. Paigunamanda maicanda yali balij tucunga nisha Cristo mandana partii. Jesús paigunara yachachinara munaca ricuchishcahua. Shinajpi mesamanda atarisha chaupi churanara llucchica. Chaquichina llachapara apisha chumbilica. Chi huasha shu batiai yacura talisha pai yachachishca runauna chaquiunara maillasha chaquichica.

Jesús Simón Pedroma pactamujpi Pedro tapuca: Canzhu ñuca chaquira maillahuangui? nisha.

Jesús paita cutipasha nica: Ñuca raushcara chara mana intindinguichu, nica, astaun huasha intindinguimi.

Randi Pedro, Señor paihua chaquira maillaujpi, mana balingachu, nisha iyarica. Pedro casna nica Jesusma: Mana ima uraspas ñuca chaquira maillahuacanguichu, nica:

Jesús cutipaca: Ñuca canda mana maillajpiga, mana ushanguichu ñucara catij runa tucungaj.

Simón Pedro Jesusta cutipasha nica: Señor, mana chaquillara maillahuangui astaun maquiras umaras maillahuai.

Jesús cutipasha nica: Armashca runa chaquillara maillanara ministin. Shinajpi chaquiunara maillashca huasha Jesús paihua llachapara churarisha cuti mesai tiarica.

Jesús yachachishca runaunara pai rashcara intindichica casna nisha: Nucaga Señor, Yachachij asha canguna chaquira maillashcani, shinallara canguna shujguna chaquira maillana anguichi. Ñuca shu ricuchinara cangunara ricuchishcani, ñuca rashcasna canguna shinallara ranguchi. Sirvijga paihua patronmanda mana yalinzhu. Shinallara mandasha cachaushca runa paita mandajmanda mana yalinzhu. Canguna cai camachishcaunara yachasha pactachisha cushi shunguyuj anguichi.

Jesús nica: Caita ñuca mana tucuigunamanda rimanichu. Ñuca acllashca runaunara ricsinimi. Astaun Diospa Shimira pactachingaj casnami tucunga: Ñucahua pariju tandara micuj runaga paihua chaquira atarichisha ñucahua contrara rangami. Cunamanda ñaupajma chara manara pactarijllaira cangunara rimashcani. Shina asha pactarishca uraspi ñuca cierto Diospa churi ashcara quiringuichimi.

Caita rimashca huasha Jesús paihua shungui yapa llaquirisha turbarisha nica: Cangunamanda shuj runa ñucahua contra tucusha entregangami, pai ñucahua pariju micuj ashallara.

Shinajpi yachachishca runauna parijumanda ricunausha paiguna pura tapunauca: Pita angairi Jesusta entregangaj rau runaga?

Caran shuj Jesusta tapunauca: Ñucachu ani? nisha.

Shuj cangunamanda anga, nisha Jesús nica. Shuj ñucahua parijulla micuna platui maquira satij, paimi anga. Cierta pacha ñuca Runa Churi, Jesús nishca, huañuchishca tucungaj riunimi, ñucamanda Diospa shimi quillcashcasna. Astaun chi entregaj runa turmindusta charingami ñucara entregashca raigumanda. Mas ali an maca cai entregaj runa mana pagarishca ajpi.

Juan Jesushua pariju tiarisha tapuca: Señor pitairi? nisha.

Jesús cutipasha nica: Tandara cushca runami anga nica.

Jesús ña tandara ucuchisha Judas Iscariotema cuca. Judas shungu ucuma satanas supai apu icushca aca.

Judas tapuca: Señor ñucachu ani?

Ari, Jesús cutipaca.

Chi huasha Judasta nica: Can rangaraushcara uctalla rai.

Judas tandara apishca huasha llucshica tutai. Pai sacerdote apuunama rica Jesusta entregangaj. Apuuna cullquira Judasma cunauca Jesusta entreganamanda.

Judas tutai llucshishca huasha Jesús tandara apisha bindiciashca huasha tandara paquisha caran yachachishca runaunama cuca. Pai nica: Cai tandaga ñuca aichami, canguna randimanda cushcami. Apichi, micuichi. Caita raichi ñucara iyaringaj.

Shinallara tandara micui pasashca huasha, Jesús vasura apisha Diosta agrasica. Paigunama cusha nica: Tucui canguna upichi. Caimi ñuca mushuj pactachina shimira alichina yahuar. Ñuca yahuar ashca runaunamanda talishcami uchaunara perdonangaj. Caita raichi caran cuti cai upina vasora upisha ñucamanda iyarichi. Shinajpi cunamanda ñaupajma ima uraspas quirijguna tandarisha tandara vasora apisha Jesús huañushcara canguna uchaunara perdonashcara iyaringuichi. Caimi Santa Cena nishca an.

Jesús paihua yachachishca runaunandi Santa Cena pasashca huasha shu mushuj camachinara yachachica casna nisha: Shu mushuj camachishca shimira cangunama cuni parijumanda llaquinausha causanguichi. Ñuca cuinta parijumanda llaquinaupiga tucui runauna ricsinaungami cierto ñuca yachachishca catijgunami nisha.

Pedro Jesusta tapuca: Maimara riungui? Jesús cutipaca: Ñuca riushcama catinara mana ushanguichu astaun huasha ushanguimi.

Pedro chita uyasha tapuca: Imarasha canda cunallara mana catingaj ushani? Ñuca causaira cushami can randimanda.

Jesús Pedrora cutipasha nica: Camba causaira ñuca randimanda cinguichu? Cierta pacha canda nini; Gallo manara cantajllaira can quinsa cuti Jesusta mana ricsinichu ninguimi.

Jesús yachachishca runaunama rimaca: Riunimi, ñuca riushcara yachanguichi shinallara ñambiras.

Randi Tomás caita mana ali intindisha Jesusta tapuca: Señor, can riushcara mana yachanchichu. Caita mana yachasha imarasha ñambira ricsinanga?

Jesús paita nica: Ñucami ñambis ani, cierto shimis ani, causais ani. Mana pihuas Yayajma shamungachu mana ñucajma shamusha. Ñucara ricsisha Yayaras ricsinguichimi. Cunamandallara Diosta ricsinguichimi paitas ricushcanguichimi.

Felipe Jesusta nica: Señor, Yayara ricuchi huapai, chillara munanchimi.

Jesús paita cutipasha nica: Ashca punzhaunara cangunahua pari ju tiaushcani can chara ñucara mana ricsihuashcanguichu? Maicans ñucara ricusha Yayaras ricushcami. Imasna ajpira shina ningui Yayara ricuchi huapai? Chara manzhu quiringui ñucaga ñuca Yayajpi tiashcara, Yaya ñucajpis tiashcara? Dios ñucajpi causaun, pai tarabanara ñucajpi raun.

Yachachishca runaunara Jesús mas nica: Ñuca cushi shungura cangunama cunimi. Mana cai pacha cushcasna cunichu. Canguna shungu ucui ama turbaringuichichu. Shinallara ama manzharinguichichu.

SANTA CENA TAPUNAUNA

*Panga 11 cai cutipanara tupanguimi.*

1. Jesús paihua yachachishca runaunandi Jerusalembi tiaushcai ima istara pactaca?
2. Jesús paihua yachachishca runamanda maican runarara acllashca shu huasima cachangaj?
3. Micunara puruntushca huasha tutayajpi Jesús pai yachachiushca runaunahua mesai tiarisha imara nica?
4. Micuushcai pigunara piñanunauca?
5. Imamandara piñanunauca?
6. Chi huasha shu batiai yacura talisha paiguna chaquira imara rarca?
7. Jesús Simón Pedroma pactamujpi Pedro imara tapuca?
8. Pedro Señor paihua chaquira maillaujpi imara iyarica?

*Panga 11 y 12 cai cutipanara tupanguimi.*

9. Jesús yachachishca runaunara pai rashcara intindichichachu?

*Panga 12 cai cutipanara tupanguimi.*

10. Diospa ñaupajpi maicanda mas balin: sirvijta o mandajta?

11. Jesús pitara ricsin?

12. Paihua shungui Jesús imara iyarishara llaquirin?

13. Jesusta entregaj runa imara tucunga nin?

*Panga 13 cai cutipanara tupanguimi.*

14. Jesús Judasta imara nica?

15. Judas tandara apishca huasha maimara llucshica?

16. Judas llucshishca huasha Jesús tandara apisha bendiciashca huasha pigunamara cuca?

17. Jesús tandara cusha imara ricuchin nica?

18. Imara iyarisha tandara micuichi nica?


19. Shinallara micushca huasha vasura apisha imara ran?

*Panga 13 cai cutipanara tupanguimi.*

20. Caran cuti vasura apisha pimandara iyarichi nica?
21. Imara an Santa Cena?
22. Jesús paihua Yachachishca runaunandi Santa Cena pasashca huasha imara yachachica?
23. Pedro Jesusta imasna nishara tapuca?

*Panga 14 cai cutipanara tupanguimi.*

24. Pita yayara ricuchihuapai nica?
25. Jesús paita cutipasha imara nica?
26. Jesús Diosmandachu?
27. Dios Jesuspi tarabaunzhu?
28. Cushi maimandara shamun?
29. Yachachishca runaunama Jesús imara nica?



АБ

## JESUS GETSEMANII ENTREGASHCAMANDA

Jueves tutai Jesús paihua yachachishcaunandi Santa Cenara micushca huasha shuj micuna muyu pambai purinauca Jerusalem mayambi. Cedro nishca yacu chimbana Getsemani nishca pambama rinaucami.

Chi pambai pactasha Jesús paigunara nica: Caibi tiarichi nisha ñucaga Diosta mañangaj riunimi. Jesús ña riusha quinsa runara acllaca. Pedrora, Santiagora, Juandas, pushasha rica Diosta mañangaj.

Jesús chibi paigunara nica: Ñuca almai huañunalla llaquirinimi. Chapaichi caibi, ñuca Diosta mañangaj riunimi.

Shina nisha Jesuslla ansa ñaupasha rica, shu rumira shitashca tupui. Jesús allpai cungurisha Diosta mañaca casna nisha: Ñuca Yaya, can tucuirajmi angui. Can munajpiga cai turmindarinara dzaslla pasachihuapai ñucamanda, randi mana ñuca munashcasna, astaumbas can munashcasna rashca achu.

Jesús Diosta mañashca huasha tigramusha, paihua quinsa runauna puñusha siriugunara tupaca.

Jesús Pedrora rimaca: Manzhu canguna quinsa pura shu ura tupura chapanara ushapanguichi? Chapaichi mañaichi ama tentacionbi urmangaj. Cierta pacha almai munai anmi Dios munashcara rangaj astaun aichai sambayashcama an nica.

Jesús cutillara rica Diosta mañangaj. Jesús casna mañaca: Yaya, nisha, cai turmindusta ñucamanda mana pasachinara ushajpiga ñuca mana turmindairijpi astaun cambia munai rashca achu.

Jesús cuti shamusha paihua runauna cuti puñushcara tupaca. Paiguna puñushcara ricusha Jesús cuti saquisha rica Diosta mañangaj. Ña quinsa cuti Diosta mañaca ñaupá nishca cuintallara rimasha.

Shinajpi Jesús yachachishcaunama shamusha nica: Ña uras pactamushcami Runa Churi uchayuj maquiunama entregashcami tucunga. Atarichi, acuichi. Ricuichi ñucara entregaj runa ña shamushcami.

Jespus chara rimaushcai Judas ashca runaunahua pactamuca. Espadaunahua, caspiunahua shamunauca Jesusta apingaj. Chi muntunmanda anauca; sacertodeuna, soldaruuna, escribas nishcauna, temploi yachachiujuunas.

Jesús paigunajma risha tapuca: Pitara mascaunguichi? nisha.

Nazaretmanda Jesusta mascaunchi, ninauca.

Jesús paigunara nica: Ñucami ani.

Shina nijpi runauna ashca manzharishcahua huashama tigrarisha allpai urmanauca.

Jesusta entregaj, Judas nishca runa, soldaruunama shu shimira cushca aca casna nisha: Ñuca muchashca runaga paimi Jesús anga. Paita apinguichi nica.

Chi soldaruuna atarijpi Judas Jesuspajma risha saludaca: Alillachu angui Yachachij? nisha paita muchaca.

Jesús Judasta nica: Cai Runa Churira amigo cuinta rasha muchasha ñucara entreganguichu? nisha.

Caita ricusha soldaruuna shamusha Jesusta apinauca preso tucungaj.

Shina tucujpi Pedro pai charishca espadara aisasha shu sacerdote apura sirvij runara rinrira pitica.

Shinajpi Jesús Pedrora nica: Camba espadara cuti sati cara ucui. Tucui espadara apijguna espadahua huañunaungami. Ahuantaichi, nica. Manzhu yachangui cunallara ñuca Yayara mañangaj ushani. Paita mañajpi ashca huaranga angelgunara cachamunmami ñucara cuirangaj. Dios shina angelgunara cachamujpiga Diospa shimi mana pactachin maca.

Jesús shina rimashca huasha pitishca rinrira llangasha alichicami.

Shamuj runaunara Jesús tapuca: Imarashara shu shuhujta cuenta llucshimucanguichi espadaunahua caspiunahua ñucara apingaj? Caran punzha cangunahua tiashcani Diospa templo huasii yachachisha randi chibi ñucara mana apihuacanguichi. Tucui caiguna shina tucuca Diospa shimi pactachingaj.

Casna tucujpi tucui pai yachachishca runauna manzharisha Jesusta saquisha miticunauca. Soldaruuna Jesusta huatasha apisha pushanauca sacerdote apuunajma.

## JESUS GETSEMANII ENTREGASHCA TAPUNAUNA

*Panga 19 cai cutipanara tupanguimi.*

1. Jesús ima tutaira llucshica Getsemanima?
2. Pihuara rica Jesús Getsemanima?
3. Jesús imacta rica Getsemanima?
4. Jesús Diospa churi ashallara caran cuti Diosta mañaca. Manachu ñucanchi Jesusta quirijsuna asha ministinchi Jesús cuintallara mañangaj?
5. Jesús cai mundui causaushca uraspi llaquiricachu?
6. Jesús paihua quiquin munashcara o Dios munashcara acllaca?
7. Can shinallara iyaringui maicandara acllangaraungui?
8. Imara tucuca yachachishcauna Jesús mañaushca uraspi?
9. Jesús imara mandaca yachachishcaunama?
10. Imasna nisha Diosta mañanguichi nisha mandaca?
11. Can shinallara Diosta mañashcanguichu ama tentacionbi urmangaj?

12. Jesús Diospa churi cai mundui turmindus llaquirinahua pasashcachu?

Can turmindusta maican uras pasausha Jesús cuinta Diosta mañangui casna nisha: Pasachihuapai randi mana ñuca munashcasna astaunbas can munashcasna rashca achu.

*Panga 20 cai cutipanara tupanguimi.*

13. Shu cutillachu Jesús Diosta mañaca?

14. Can imasna cutira Diosta mañangui?

Jesús cuinta ashunchi caran cuti Diosta mañangaj.

15. Jesús turmindus ña pactamujpi callpacachu turmindusmanda?

16. Pigunara shamunauca Jesusta apingaj?

*Panga 21 cai cutipanara tupanguimi.*

17. Pedro imara rarca?

18. Jesús imara nica espadara apijgunama?

19. Imara ranara ushan Dios pai munasha?

*Panga 21 cai cutipanara cutipanguimi.*

20. Imarashara Jesús Diosta mana mañaca paita angelguna cuirangaj?
21. Ima tunuunahuara shamunauca Jesusta apingaj?
22. Ima rashara Jesús templo huasii paigunahua pariju yachachisha tiautara mana apinauca?
23. Jesús api tucujpi pai yachachishca runauna imara ranauca?
24. Maican uras can shu runa turminduspi pasaupi ricusha yanapan-guichu o manachu yanapangui?

## JESUS ATUN SACERDOTE APU ÑAUPAJPI

Tutai soldaruuna Jesusta apishca huasha paihua maquira huatasha parijsu pushanauca taripangaj. Jerusalem llacta ucuma ac sacerdoteuna atun apu huasima pushanauca. Ñaupapunda Jesusta pushanauca Anaspa huasima. Anás nishcaga Caifaspa huarmi yayami aca. Caifasga chi huatai sacerdoteuna atun apumi aca.

Chaupi tutai shu tandarina tiaca apu huasii. Chi sacerdote apuunahua tucui judiogunara mandajgunandi tandarimusha contra shimiunara mascanauca Jesusta huanuchingaj. Jesús cai mundui tucuiru alira rashcami shinajpi shujta ministinauca Jesuspajmanda llullangaj. Ashca runauna yanga llullasha Jesusmanda rimanauca. Randi paiguna rimashca shimiuna mana parijsu tunullachu aca, shina llullashca raigumanda.

Puchucaibi ishqui runauna llullasha casna nisha pactanauca apu ñaupajpi: Jesús ñucanchi uyaushcai rimaca: Diospa templo huasira tulashami randi quinsa punzhai cuti shayachishami nisha Jesús rimaca, ninauca.

Sacerdote atun apu Jesusta tapuca: Manzhu imaras cutipangui? Imara rimanaun canmanda contrara raujguna?

Jesús chunlla tiauca, mana imaras cutipacachu. Jesús paihua contra raujgunara ricsica riparasha enemigounaga shu shimira mascanauca paita huanuchingaj.

Shinajpi sacerdote atun apu Jesusta nica: Causaj Diospa shutii rimahuai. Cristo nishca Diospa Churichu angui? tapuca.

Jesús paita cutipaca: Ñuca mani can nishcasna. Canda nini: Puchucái uras Runa Churi Diospa ushana ali maqui partima tiarishcara ricunguichimi. Ahua pacha puyunai shamushcara ricunguichimi.

Shinajpi sacerdote atun apu casna nishcara uyasha piñarisha paihua churanara liquisha caparica: Diosmanda irusta rimashcangui. Shu contra rimajgunara mana ministinchichu.

Chi shuj sacertodeunama ricusha tapuca: Imara ninguichi?



Cutipasha ninauca: Culpayujmi huañunami anga, nisha.

Shinajpi Jesusta burlasha paihua ñahuii tiucanauca. Paita sajmanauca. Shujguna maqui palahua huactanauca randi Jesús imaras mana cutipacachu cai turmindusmanda.

Jesusta Getsemanii apishca uraspi Pedro, Juan miticunauca, randi cunaga sacerdote atun apu huasii shamunauca. Chibi chapanauca imara Jesushua susuringaj raun, nisha. Pedro sirvijgunahua pacllai tiarica nina mayambi randi Juan huasima icuca.

Shuj sirvij huarmi Pedrora nina mayambi ricusha paita tapuca: Manzhu can Jesuspa yachachishca runa angui?

Pedro cutipaca: Mana, paita mana ricsinichu, nisha. Chi ratullai gallo cantashcara uyaca.

Shu ratu huasha shu huarmi pungu mayambi tiasha Pedrora ricusha tapuca: Can manzhu Jesuspa runa angui, manzhu shina?

Randi Pedro cutipaca: Mana, mana Jesuspa runachu ani.

Shu uras huasha runauna Pedrora rimanauca: Can shinallara Galileai Jesushua tiauj angui. Ciertu pacha chi llactamandami angui. Can rimana tunu canda ricsichin.

Chi shimiunara uyashca huasha Pedro irus shimiunaras Dioshua contra shimiunaras rimangaj callarica. Maspas casna nica: Canguna niushca Jesusta mana ricsinichu. Shina nishca, huasha gallo cuti cantaca.

Cai susuriushcai Jesús Pedrora ricuca. Jesús Pedrora ricujpi Pedro iyarica Jesushua pai ñaupá cuintanaushcara. Pedro ñaupá nica: Tucuiguna canmanda saquirinaupus ñuca ima uraspas mana saquirishachu.

Jesús paita nica: Pedro, cierto pacha canda nini: Cuna tuta gallo manara ishqui cuti cantajllaira can ñucamanda quinsa cuti paita mana ricsinichu ninguimi.

Jesús ñaupá nishca ciertomi tucuca. Pedro cunaga riparasha imasna pai llullashca, uchara Jesushua contra rashcaras iyarisha canzhama llucshisha llaquira huacaca.

JESUS ATUN SACERDOTE APU ÑAUPAJPI TAPUNAUNA

*Panga 25 cai cutipanara tupanguimi.*

1. Tutai soldaruuna Jesusta micuna muyu pambai apishca huasha imara ranauca?
2. Soldaruuna Jesusta maimara pushanauca?
3. Anás Jesusta gustacachu?
4. Chaupi tutai shu tandarina apu huasii tiaushcai ima shimirara mascanauca?
5. Jesusmanda ali shimirachu rimanauca?
6. Puchucaibi ishqui runauna pactanauca apu ñaupajpi. Ima contra shimiunara Jesusmanda rimanauca?
7. Jesús pigunarara ricsica?
8. Sacerdote atun apu Jesusta imarara nica?
9. Jesús imasna nishara cutipaca?

*Panga 27 cai cutipanara tupanguimi.*

10. Chi burlajguna imara ranauca Jesusta?
11. Jesusta micuna muyu pambai apishcai Pedrohua Juanhua imara tucunauca?
12. Pedro pigunahuara pacllai tiauca?
13. Shu sirvij huarmi Pedrora ricusha imasna nishara tapuca?
14. Imara cutipaca Pedro?
15. Shu ratu huasha cuti shu huarmi Pedrora imasna nishara tapuca?
16. Imara cutipaca Pedro?
17. Jesús Pedroma ricujpi Pedro imara iyarica?
18. Pedro pai rimashcara riparasha imara rarca?

## PILATO ÑAUPAJPI JESUS TARIPARIUN

Jesupa enemigouna paita huañuchinara munanauca randi gobernador Pilato permiso illajpi mana ushanaucachu huañuchingaj. Chi raigumanda chi tutamandai ashca runa Pilato gobernador huasi ñaupajpi shayanauca Jesushua. Chi tucushcara ricusha soldaruuna Pilatoma rimanauca. Romanos soldaruuna Jesusta Pilato tiaushca ucuma pushanauca taripangaj.

Sacerdote apuuna chibi tiaushallara sasiuguna anaUCA. Chi raigu mana icunauca taripaushca ucuma, icujpiga paigunara huaclichingami nisha iyanauca.

Shinajpi Pilato canzhama llucshimusha paigunara tapuca: Imamandara caudzayachinguichi cai Jesusta?

Cutipasha ninauca: Cai runa mana caudzayuj ajpi cambajma mana pushamunchimachu aca.

Shinajpi Pilato judiogunara nica: Cangunalla paita pushaichi canguna munashcara paita taripaichi.

Judioguna cutipanauca: Ñucanchiga pitas mana huañuchinara ushanchichu, ninauca.

Shinajpi Pilato cuti taripana huasii icuca. Jesusta cayasha tapuca: Can judioguna rey apuchu angui? nisha.

Ari, judioguna reymi ani, nisha cutipaca. Ñuca mandana pacha mana cai pachamandachu randi cai pachama shamucani runaunara cierto shimira rimangaj.

Pilato Jesús rimashcara uyasha canzhama cuti risha paigunara rimaca: Ima caudzaras paihuajpi mana tupanichu, nica.

Astaun paiguna mas caparinauca, casna nisha: Paiga runaunara Galileamanda Jerusalemgama turbachijmi aca.

Shinajpi Pilato Galilea llacta shutira uyasha Jesusta tapuca: Can Galileamanda runachu angui? nisha. Jesús Galileamanda acta yachasha Pilato Galileamanda ac apu Herodespajma cachaca.

Ansalla huasha Herodesta sirvij runa paita casna cuentaca: Jesús canzhai caudzayuj cuinta ashca runaunahua shayaun. Herodes Jesusta ricusha cushiyaca. Unaimanda pacha Jesusta ricunara yapa munaca. Paiga Jesusmanda ashca shimiunara uyaj aca. Jesús ima munanaita rashcara ricungaj munaca.

Jesusta ucuma apanaupi Herodes ashcara caran tunumanda paita tapuca. Astaun Jesús imaras mana cutipacachu. Imaras Herodes tapujpi Jesús mana ansas cutipacachu. Herodes apu ñaupajpi temploi yachachiujguna, sacerdote apuunandi shinzhira llullasha Jesusta caudzayachinauca. Herodes Jesuspi mana ima culparas tupajllaira paihua soldaruunandi Jesusta burlasha pucllanauca rey cuinta llachapara churachisha asinauca.

Chi huasha Herodes Jesusta cuti Pilatojma taripangaj cachaca. Jesús Pilatojma pactamujpi Pilato sacerdote apuunara judio apuunaras runaunandi cayasha casna rimaca: Jesusta canguna ñaupajpi taripashcanimi. Canguna culpachishcara mana tupashcanichu paihuajpi. Ñuca Jesusta Herodespajma cachacani. Shinallara Herodes mana ima culparas tupacachu. Cai Jesús nishca cierto pacha mana imas huañuchihujlla rashcachu, nica. Ñuca Jesusta huascahua libachishca huasha cacharisha.

Pilato caran Pascua ista punzhai shu caudzayuj runara cacharij aca. Maicandas tucui runauna mañashcara cacharij maca. Shu Barabas nishca runa macanausha shu runara huañuchijmi aca.

Pilato runaunara tapuca: Pitara munaguichi ñuca cacharingaj nisha, Barabasta o Jesuscristora?

Tucui runauna caparinauca: Barabasta cachari nisha.

Pilato paigunara tapuca: Imara rashairi Cristo Jesús judioguna rey nishcara?

Runaunaga caparisha cutipanauca: Chacatanami! Chacatanami!



Pilato cuti ucuma icusha paihua soldaruunara Jesusta libachingaj mandaca. Soldaruuna casha llaitura ahuasha Jesuspa umai churachinauca. Paita puca llachapara churachinauca. Alabashcangui, ninauca judioguna rey apu. Shina nisha Jesusta sajmanauca burlasha rimanauca.

Pilato taripana puestui tiashcai paihua huarmi carima rimairica casna nisha: Ama imaras ranguichu chi runa Jesusta. Ñuca tuta nuspaibi shu manzhanaita turbarina nuspaira nuspacani Jesusmanda.

Shina nijpi Pilato cuti canzhama llucshimusha judiogunara nica: Ricuichi Jesusta llucchimuni ima culparas paihuajpi mana tupanichu.

Pilato iyaca shina rashcara ricusha runauna Jesusta llaquinaungami nisha. Paiguna Jesusta llaquinaupiga caudzayanamanda llushpichisha libachishalla cacharingaj nisha munaca.

Randi paiguna mas shinzhira caparinauca. Chacatanami. Chacatanami. Ñucanchi ley shimi mandashcasna pai huañunami anga Diospa Churi ani nishcamanda.

Chita uyasha Pilato maspas manzharica Jesusta pushasha cuti taripana huasima icuca. Pilato Jesusta tapuca: Maimandara angui can? nisha.

Jesús mana imaras cutipacachu.

Shinajpi Pilato Jesusta: Imarasha mana cutipahuangui? nisha tapuca. Manzhu yachangui canda chacatangaj ushaira charini, shinallara canda cacharina ushairas charini?

Jesús Pilatora cutipaca: Can mana ima ushairas charinguimachu aca Yaya Dios ahua pachamanda ushaira canma mana cushcajpi.

Jesús shina rimashcara uyasha Pilato chi ratullai iyarica Jesusta dzaslla imaras rasha cacharingaj munaca. Chi huasha Pilato runaunajma risha Jesusta cacharishun nisha nica.

Randi judioguna astaun caparisha ninauca: Can cai Jesusta cacharishaga mana Cesarba atun mandaj amigochu angui ninauca.

Shinajpi Pilato chi shimira uyasha Jesusta canzhama pushasha paigunara nica: Caibimi canguna rey apu. Canguna rey apura chacatashun ninguiichichu?

Runauna cutipanauca: Cesarlla ñucanchi rey apumi shujpas illami! Jesusta llucshinami llucshinami, paita huañuchinami, chacatanami nisha caparinauca.

Shina caparijpi Pilato Jesusta paigunama entregaca. Paiguna munashcara rasha chacatanauchu nisha lugarda cuca Jesús mana imas culpaj aclaira. Barabas pai shuj runara huañuchij aclaira presomanda caudzamanda lugaryachica.

#### PILATO ÑAUPAJPI TAPUNAUNA

*Panga 30 cai cutipanara tupanguimi.*

1. Romanos soldaruuna Jesusta pi tiaushcamara pushanauca?
2. Pilato canzhama llucshisha paigunara imasna nishara tapuca?
3. Shina nijpi paiguna imasna nishara cutipanauca?
4. Chi huasha Pilato cuti taripana huasima icusha Jesusta imasna nishara tapuca?
5. Jesús judioguna rey apuchu?

*Panga 30 cai cutipanara tupanguimi.*

6. Imarasha shamuca Jesús cai pachama?
7. Pilato ima caudzaras tupacachu Jesuspi?

*Panga 31 cai cutipanara tupanguimi.*

8. Herodes Jesusta ricusha imara sintica?
9. Jesús Herodes tapujpi cutipacachu?
10. Herodes Jesuspi mana ima culparas tupajllaira paihua soldaruuna Jesusta imara ranauca?
11. Pilato runaunara imasna nishara nica?
12. Paiguna imasna nisha caparinauca?

*Panga 33 cai cutipanara tupanguimi.*

13. Pilato ucuma icusha paihua soldaruunara ima rangajta mandaca?
14. Soldaruuna casha llaitura ahuasha pitara churarinauca?
15. Pilato taripana puestoi tiaushcai paihua huarmi imara rimaca?

*Panga 33 cai cutipanara tupanguimi.*

16. Pita ushaira cun apuunama?

17. Pilato canzhama cuti llucshisha judiogunara imara nica?


18. Pilato imara munaca?

*Panga 34 cai cutipanara tupanguimi.*

19. Runauna pitara acllanauca huañuchingaj?

20. Runauna pitara acllanauca lugaryachingaj?

21. Paiguna caparijpi Pilato Jesusta pimara entregaca?



## JESUSTA CHACATASHCAMANDA

Caibi yapa llaquirishca cuentanara charinchi. Pilato apu Jesusta judiogunama entregajpi chacatangaj soldaruuna Jesusta pushanauca llacta mayambi ac Golgota nishca urcuma. Jesusta paihua quiquin crusta apachisha chacatana lugarma pushanauca. Riushcai shu Cirene nishca llactamanda Simón nishcara tupanauca. Soldaruuna Simonda mandanauca Jesús apasha riushca crusta pai randi apangaj.

Ishqui shuhuj runara shinallara Jesushua pariju pushanauca chacatangaj. Ashca runauna Jesusta catiushcai maican huarmita ashca llaquirishcahua huacanauca.

Jesús huashama bultiarisha rimaca: Jerusalenmanda ac huarmita ama ñucamanda huacaichichu astaun camba quinquin causaimanda shinallara camba huahuaunamanda huacaichi.

Ña "Gólgota" Uma Tullu nishca urcuma pactanauca. Pactasha shu runa Jesusta ayaj vinora shu ayaj ambihua masashcara ricuchica nanaira pasachingaj randi Jesús mana upicachu. Chi huasha soldaruuna Jesusta cruspi chactanauca. Shinallara ishqui shuhujgunara caran mayanma chactanauca shujta ali partima shujta llucui partima.

Ashca runauna mayambi shayasha huaquinguna Jesusta burlasha asinauca.

Randi Jesús Diosta nica: Yaya, paigunara perdonapai. Paiguna quiquin rashcara mana intindinaunzhu.

Jesusta crus ahuai chacatashca huasha soldaruuna paihua churanara chaupichisha apanauca randi shuj mas valij churanara sortiasha apinauca. Manara casna tucushcai Diospa Shimi casna tucungami nisha rimashca siriuca.

Pilato, Jesuspa crus ahuai quillcachisha churaca: Caimi Jesús Nazaretmanda judioguna rey apu, nisha. Jesusta Jerusalen llacta mayambi chacatashca raigumanda ashca judioguna cai quillcashcara ricunauca.

Chita ricusha judioguna sacerdote apuunas Pilatota ninauca: Judio-  
guna rey apumi nisha ama quillcanguichu, randi Pai nica judioguna rey  
apumi ani nisha quillcangui.

Shinajpi Pilato cutipaca: Ñuca ña quillcashcara quillcashcami, nica.

Ashca runauna pasasha Jesusta burlasha caparinauca casna nisha:  
Can Diospa Churi ashaga crusmanda llushpiri.

Sacerdoteunas rucuunas ninauca: Chishujgunara quishpichij aca  
randi paillara quishpiringaj mana ushanzhu. Ciertó judio rey apu ashaga  
llushpiri chi crusmanda llushpirimujpi paita quirishami ninauca.

Maspas Jesushua pari ju ishqui chacatashca mana ali rajgunamanda  
shuj Jesusta camisha piñaca: Can Cristo ashaga canllara quishpiri  
shinallara ñucanchiras quishpichi.

Chi shujga Jesusta piñauj runara paita camachisha nica: Manzhu  
can Diosta manzhanguí? Ñucanchi mana ali rashcamanda caudzayachishca  
anchi randi pai ima mana aliras mana rashcachu.

Chi shujta camachiu j runa Jesusta nica: Iyarihuapanguí can mandana  
pachai pactasha.

Shinajpi Jesús paita cutipaca: Ciertó pacha canda nini, cuna  
punzhallara ñucahua pari ju Paraiso nishca sumaj llactai tiaunguimi.

Jesús crusmanda paihua mamara ricusha nica: Mama chibi charingui  
camba churira.

Chi huasha pai yapa llaquisha yachachishca runara nica: Chibi  
charingui cambia mamara.

Chaupi punzha tupui tun llanduyaca, tuta cuinta tucuca tucui partii,  
las tres chishi tupugama shina tucusha pasaca.

Shina tucushcai Jesús shinzhira caparisha nica: Ñuca Dios, ñuca  
Dios. Imarashara ñucara saquihuashcanguí?

Caita rimashca huasha Jesús, Dios mandashca tarabanara ña pactachisha tucuchishcama tucuca. Shina nisha: Upinaimi nica. Shu runa callpamusha shu tsungarina putusta ayaj vinohua chupachisha Jesusta cuca upingaj.

Shina tucushca huasha Jesús shinzhira caparica: Ña tucuchishcami, nica. Huasha Diosta mañasha nica: Yaya, ñuca almara cambia maquii entregani.

Casna nishca huasha umara uraima lapusha samai pitirisha huañuca.


Chi ratullai templo huasii huamburai llachapa chaupi chaupii liquirica ahuamanda allpagama. Allpas shinzhira cuyuca piñasgunas partirinauca. Pambashca uctuunas pascarinauca.

Chacataushca crus mayambi shayauj capitanga casna tucushcara ricusha nica: Cierto pacha cai runa ali runami ashca. Diospa Churimi aca.

Tucui chibi taucarai runauna casna tucushcara ricusha manzharisha huasima rinauca. Jesuspa amigouna carumanda tucuiricusha yapa ashcara llaquirinauca.

Chishinaibi Pilato soldaruunama permisora cuca cruspi chacatash-caunara chaquiunara paquingaj. Jesushua pariju chacatashcaunara chaquiunara paquinauca. Randi soldaruuna Jesuspajma pactanauca huañushcara tupanauca chi raigu espadahua Jesusta tucsinauca. Chi tucsishcamanda yahuarndi yacundi talirica.

José shuj Jesusta catij runa Pilato apura mañaca huañushca Jesuspa aichara paihua allpai pambangaj. Pilato cierto huañushcara yachasha cuca. Chi punzhai Jesuspa amigouna paita ali llachapahua pillusha Josehua pambana uctuma apasha churanauca. Mushuj pambana rumi ucui Jesusta pambanauca atun rumihua pungura tapanauca. Soldaruuna iquihua pungura tapasha cuiranauca ama pihuas Jesuspa aichara shuhuasha causarishcami ningaj.



A6

Huarmiuna ali asnaj ambiunahua armachinauca huañushca Jesuspa aichai pambangaj. Randi cayandi sábadu punzhami aca. Semana tucurina punzhai judioguna ley mandashcasna samanauca Diosta iyaringaj. Chi raigumanda paiguna pambashca uctuma puringaj mana ushanaucachu.

Jesús ñucanchimanda cruspi turmindarisha huañuca. Diospa Shimi Juan 3:16 casna nin: Casnami Dios cai pachara llaquica, paihua sapalla churira cachamuca maicans paita quirisha mana chingaringachu astaumbas huiñas causaira charinmi.

#### JESUSTA CHACATASHCAI TAPUNAUNA

*Panga 38 cai cutipanara tupanguimi.*

1. Jesusta chacatangaj ima shuti urcumara pushanauca?
2. Pita Jesusta judiogunama entregaca?
3. Jesusta paihua quiquin crusta apachisha maimara pushanauca?
4. Ashca runauna Jesushua catiushcai pigunara huacanauca?
5. Pactasha shu runa imacta ayaj vinora shu ayaj ambihua masashcara upichica?
6. Chi huasha Jesusta soldaruuna imara ranauca?
7. Jesusta pigunahuara chacatanauca?

*Panga 38 cai cutipanara tupanguimi.*

8. Ashca runa mayambi shayasha huaquiguna Jesusta burlasha asinauca. Chita uyasha Jesús Diosma imara nica?
9. Jesusta crus ahuai chacatashca huasha pigunara churanara chaupichinauca?
10. Manara casna tucushcai Diospa Shimi imasna nishcara siriuca?
11. Pilato Jesuspa ahuai imasna nishara quillcaca?

*Panga 39 cai cutipanara tupanguimi.*

12. Maspas Jesushua pariju ishqui chacatashcamanda Jesusta piñasha imarara nica?
13. Chi shujga Jesusta piñaujta imara nica?
14. Maican runara Jesusta iyarihuapangui nisha nica?
15. Jesús crusmanda paihua mamara ricusha imara nica?
16. Chaupi punzha tupui imara tucuca?
17. Shina tucushcai Jesús shinzhira caparisha imasnara nica?

*Panga 40 cai cutipanara tupanguimi.*

18. Shu runa callpamusha imara chupachisha cuca Jesusma?
19. Chi ratullai Diospa huasii ac llachapa imara tucuca?
20. Crus mayambi shayau capitanga casna tucushcara ricusha imara nica?
21. Pigunara Jesusta ricusha llaquirinauca?
22. Chishinaibi Pilato imacta permisora cuca?
23. Maican runara Jesuspa aichara mañaca?
24. Pigunara Jesusta pampashcai cuiranauca?
25. Huarmiuna imacta asnaj ambiunara armachinauca?
26. Jesús pimandara cruspi huañuca?
27. Dios cai pachara imasnara llaquin?
28. Diospa Shimi nishcara quiringuichu?



## JESUS CAUSARISHCA

Jesús huañushca punzhai paihua amigouna Jesuspa rimashca shimira: Cuti causarishami nishca shimira cungarinauca. Jesusta uctu piñas ucui pambanauca. Chi huasha shu rumira voltiachisha uctu pungura tapanauca.

Jesusta pambashca huasha sacerdoteuna Pilatoma risha rimanauca: Apu, iyarinchi imasnara cai umachij runa nica pai chara causaushcallaira: Quinsa punzha huasha causarishami, nica. Mandai, pambashca uctui cuirangaj quinsa punzhagama. Mana munanchi pai yachachishca runauna tutai shamusha aichara shuhuangaj. Cai huasha ninaungami huañushcamanda causarishcami, nisha.

Pilato, alimi nisha soldaruunara cachaca pambashca uctu pungui iquihua llutangaj, maspas pambashca lugarbi cuirangaj. Pilato mandashca soldaruuna intiru punzhandi tutandi cuiranauca.

Cungaimanda quinsa punzha tucunai allpa shinzhira cuyuca. Shu Señorba angel, ahupachamanda shamusha rumi pungura anzhuchisha chi ahuai tiarica. Angelga rayu limpiashca cuinta punzhajlla ricurij aca. Paihua llachapa rasu cuinta yurajlla ricurij aca. Soldaruuna angelda ricusha manzharisha chucchunauca, huañushcasna tucunauca.

Chaupi soldaruuna llactama callpanauca atun sacerdotejma tucui susurishcara cuintangaj. Sacerdoteuna soldaruunama cullquira paganauca.

Shina llullasha rimanguichi nisha ninauca: Ñucanchi puñushcai Jesús yachachishca runauna tutai shamusha paihua aichara shuhuasha apanaushca aca nisha.

Soldaruuna cullquira apisha shina llullasha rimangaj rinauca.

María Magdalena, Santiagohua mama María, Salomendi gustu asnaj ambira apanauca Jesuspa aichara armachingaj. Domingo tutamandara indi llucshina uraspi pambashca lugarma rinauca.

Riushcai paiguna pura tapusha ninauca: Pita atun rumira pambashca pungumanda anzhuchingairi ñucanchi icungaj?

Pambashca lugarma pactasha rumi anzhuchishcara ricusha manzharinauca. Pambashca uctui ricuirijpi Jesuspa aicha illacami. Shinara ricusha María Magdalena llactama callpaca Pedroras Juandas rimangaj.

Tupasha nica: Jesusta uctumanda apanaushcami nisha. Mana yachanichu maimara apanaushca angai.

Randi chishuj huarminiuna pambashca uctuma icunauca. Jesuspa aichara mana tupanaucachu. Illanmi, ninauca. Chi huarminiuna Jesusta mana tupasha llaquirishcahua manzharishcahua tianauca. Ishqui angelguna chi ratullai ricurimunauca. Indi quinta ricurij anauca. Chita ricusha huarminiuna ashcara manzharinauca.

Randi angel huarminunama rimaca: Ama manzharichichu, nisha. Imarasha causajta huañushca pambai mascaunguichichu? Jesús caibi illanmi. Causarishcami. Manzhu iyaira charinguichi chi Jesús causaushca uraspi nishcara?: Runa Churi uchayuj maquiunama entregashcami tucunga, cruzpi chacataringaj maspas quinsa punzha huasha cuti causarishami, nisha.

Jesús ñaupá nishca casna tucujpi, iyarisha quirinauca.

María Magdalena Pedroras Juandas llactai quintajpi paiguna pambashca uctuma callpanauca. Chibi pactasha Jesusta pillushca llachapara ali lapusha churashcara ricunauca. Juan shina ricusha Jesús causarishcara quirica.

Randi Pedro casna iyaca: Imara tucushca angai? nisha iyarica.

Pedros Juandas rishca huasha María Magdalena pambashca lugarma cuti pactairica. Canzhai huacasha tiaca. Huacasha uctuma ricuca. Ishqui angelda uctui ricuca.

Angel paita tapuca: Imarasha huacangui?

María cutipaca: Señor Jesuspa aichara apasha imaira churanaushca angai? nisha.

María voltiarisha Jesusta ricuca randi mana ricsicachu.

Jesús Mariara tapuca: Imarasha huacangui? Pitara mascangui?

María Jesusta chara mana ricsisha chi shayau cai pambashcara cuiraj runami nisha iyarisha nica: Señor, can Jesuspa aichara shuj lugarma apashca ashaga, chibimi nisha rimahuapai.

Jesús paita nica: María, nisha.

Jesús paihua shutira rimaushcai María Jesusta ricsisha cutipaca: Señormi nisha.

Jesús nica: Ñucara catijgunara cuintairi nisha: Ñuca Yayajma canguna Yayajmas, Ñuca Diosma canguna Diosma riunimi, nica.

Shinajpi María dzaslla Jesusta catijgunara cuintaca: Ñucanchi causaj Señorda ricucanimi nisha. Pai causarishcami. María ashca cushihua cuintaca: Jesús huañushcamanda cuti causarishcami.

Jesús ñaupá nishca casna tucujpi, iyarisha quirinauca.

Jesús huañushcamanda causarishca punzhai ishqui paihua catij runauna Emaus nishca ichilla llactama rinauca. Jesús causarishcara chara mana yachasha yapa llaquirishcahua riusha Jesús huañushcamanda cuintarisha rinauca. Cuintarisha riushcai causaj Cristo mayanyamusha parijulla purinauca. Shina puriushallara Jesusta chara mana ricsinauca, paiguna shina iyanauca Emaus nishca llactama puriuj runami an nisha.

Jesús paigunahua cuintaushcai chibis chara mana ricsinauca.

Jesús casna tapuca: Imara rimanauguichi cangunapura puriushcai? Imarasha ashcara llaquiringuichi?.

Shuj cutipaca: Canllachu carumanda puriuj angui? Jerusalembi cai punzhaunai tucushcaunara manachu yachangui? Ñucanchi Jesús Nazaretmanda chacatashcara cuintanaunchi imasna apuuna paita huañuchinauca. Maspas chi Jesús Israelda quishpichijmi tucunga nisha iyacanchi.

Ña cai tucushca quinsa punzha pasanmi. Maspas maican huarminiuna ñucanchi quirij muntunmanda chara llandu ashcai Jesusta pambashcama pactamusha paihua aichara mana tupanauca.

Jesupa aichara mana tupasha shayaushcai angelguna rimanauca: Jesús causarishcami nisha.

Shina nijpi causarishcami nisha ñucanchima cuintanauca. Chi huasha ñucanchi muntunmanda cariuna Jesusta pambashcama rinauca. Chibi huarmiuna rimashcasna tupanauca randi Jesusta mana ricunauca, ninauca.

Shinajpi Jesús paihua cuintaujgunara nica: Upauna, ansalla shungui quirijguna. Diosmanda ñaupá rimajguna tucui paigunaj rimashcaunara canguna quiringaj pactachicani. Manzhu ministirica Cristo turmindarisha pasangaj, turmindusta pasashca huasha paihua sumaj ahupacha llactama icungaj?

Chi huasha Jesús cuintaca, Moisesmanda pacha callarica tucui Diosmanda rimajguna quillcashcara catica. Diospa Shimi rimashca tucui parti Jesusmanda quillcashca siriuca nisha.

Jesushua pariju puriuj ishqui yachachishcauna cushiyanauca paihua shimira uyashcamanda. Llactama pactamuushcai Jesusta rimanauca: Ñucanchihua saquiri, ña tutayaunmi nisha. Shina nisha Jesusta paiguna huasima pushanauca.

Jesús paigunahua mesai tiarisha tandara apisha, bendiciasha paquica, paigunama cuca. Chi ratullai paiguna ñahui pascarijpi Jesusta ricsinauca. Paiguna cierto Jesús causarishcara ricsishcallai pai cungaimanda chingarica.

Tuta acllaira cushihua atarisha paiguna chi urasllaira Jerusalén llactama rinauca chi shujgunama Jesusta ricucanchimi causarishcami nisha cuintangaj. Chi chungu shuj yachachishcaguna parijsu ajguna. Pactamushca huasha Simón Pedro tucuigunama cuintaca casna nisha: Causaj Jesusta tupacanimi, nica.

Pedro cuintashca huasha Emausmanda shamujguna randi cuintanauca Jesusta ñambii tupashcara, tandara paquisha carashcaras. Paiguna chara chigunamanda rimauillaira cungaimanda Jesús paiguna chaupi shungui shayarica.

Shayarisha paigunara saludaca nisha: Cushi anguichi canguna.

Shini tucujpi paiguna yapa manzharinauca. Casna iyarinauca cai shayauj mana Jesuschu astaumbas paihua ayami nisha iyanauca.

Astaumbas Jesús paigunara nica: Imarasha turbaringuichi canguna shungui? Ñuca maquiunara ñuca chaquiunaras ricuhuaichi. Quiquin Jesusmi ani. Ñuca aichara llangaichi ricuichi. Shu aya, shu espíritu mana casna aichayujchu, tulluyujchu. Canguna ricunguichi ñuca imasna ashcaras. Chita rimashca huasha clavashca maquira chaquira ricuchica.

Shina Jesusta ricusha cushiyashalla chara manzhaira charinauca mana quirinaucachu.

Jesús paigunara tapuca: Charinguichu ima micunallas?

Shina tapujpi paiguna cushashca aichahuara sacha mishquira caranauca. Tucui ricuushca ñaupajpi micuca.

Jesús nica: Ñuca cangunahua tiaushcai chara mana huañushcai tucui Diospa Shimimandas quillcashcara pactachicani.

Chi huasha Diospa Shimi quillcashcara mas alira intindichica casna nisha: Cristo cierto huañungaj ministicami maspas quinsa punzha huasha causericami huañushcamanda. Yaya Dios ñucara cachashcasna shinallara cangunara cachauni. Apinguichimi Espiritu Santora. Maicanguna ucharashcamanda perdonajpi, perdonashcami tucunga.

Tucuigunama casna rimangui: Ucharashcamanda aripintingui, aripintijpiga Dios canda perdonangami, caita Jesuspa shutii rimangui.

### JESUS CAUSARISHCA TAPUNAUNA

*Panga 46 cai cutipanara tupanguimi.*

1. Ima punzhaira Jesusta chacatanauca?
2. Can Jesucristora quirisha imara charingui?
3. Pigunara Jesuspa aichara llucchisha apanauca pambangaj?
4. Maican huarminunara Jesusta pambaushcai ricuirinauca?
5. Pambana uctu ima uctura aca?
6. Chi sacerdoteuna Pilatojma risha imara rimanauca?
7. Quinsa punzha tucunai allpa imara tucuca?

*Panga 46 cai cutipanara tupanguimi.*

8. Angelga imasnara ricurimuca?
9. Chaupi soldaruuna imacta llactama callpanauca?
10. Sacerdoteuna imacta soldaruunama cullquira paganauca?

*Panga 47 cai cutipanara tupanguimi.*

11. María Magdalena pita rimangajta llactama callpaca?
12. Jesuspa aichara mana tupasha ima rashara tianauca?
13. Pita nica: Jesus causarishcami nisha?
14. Jesús ñaupá nishca shina tucucachu?
15. Pita Jesús causarishcara quirica?
16. María huacasha uctuma ricusha imara ricuca?

*Panga 48 cai cutipanara tupanguimi.*

17. Jesús Mariara pitara rimairi nica?
18. Jesús maimami ringaj rauni nicara?
19. Pita Jesús causarishca huasha ricuca?

*Panga 48 cai cutipanara tupanguimi.*

20. Jesús huañushcamanda causarishca punzhai ishqui paihua catij runauna maimara rinauca?
21. Jesús causarishcara yachanaucachu?
22. Imarasha yapa llaquirishcahua rinauca?
23. Jesús paigunara cuintaushcai ricsinaucachu?
24. Jesús imasnara tapuca?

*Panga 49 cai cutipanara tupaca.*

25. Pitara quishpichijmi tucunga nisha iyanauca?
26. Quirij huarminiuna Jesuspa aichara tupanaucachu?
27. Angelguna imasna nishara rimanauca?
28. Cariuna Jesusta pambashcama rinauca chibi Jesusta tupanaucachu?
29. Cristo turmindarinara pasangaj ministiricachu?
30. Shinajpi Jesús paihua puriugunara imara nica?

*Panga 49 cai cutipanara tupanguimi.*

31. Chi huasha Jesús imamandara cuintaca?
32. Maibira siriuca Jesusmanda quillcashca?
33. Ima raushcaira Jesusta ricsinauca?
34. Paiguna cierto Jesús causarishcara yachajllaira imara tucunauca?

*Panga 50 cai cutipanara tupanguimi.*

35. Tuta acllaira cushihua atarisha maimara rinauca?
36. Imarasha Jerusalén llactama rinauca?
37. Pita nica? Causaj Jesusta tupacanimi?
38. Imarasha yapa manzharinauca?
39. Pedro cuintashca huasha maimanda shamujgunara cuintanauca?
40. Paiguna chimanda cuintaushcai pita chaupi shungui shayarica?
41. Jesús paigunama imara nica?

*Panga 50 cai cutipanara tupanguimi.*

42. Jesús causarishca huasha clavosta tacashca uctu ricuricachu?
43. Jesús huañushcamanda cuti causarishca huasha micucachu?
44. Jesús paigunama tapuca charinguichichu ima micunallas paiguna imara cunauca?

*Panga 51 cai cutipanara tupanguimi.*

45. Pitara Jesús cachauca?
46. Jesús paigunama imara nica?
47. Chi huasha ima shimirara mas intindichica?
48. Imasna rashara perdonashca tucunga?



## CAUSAJ CRISTO

Jesús huañushcamanda cuti causarishca huasha paihua yachachishcaunama pactamuca. Randi Tomás Jesús ricuchiushca uraspi illacami. Chi shujguna Tomasta shina susurishcara cuintajpi Tomás mana quiricachu.

Tomás paigunara nica: Jesuspa maquii clavashca uctuunara mana ricusha, ñuca rirura paihua clavashca uctuunai mana satisha mana quirishachu nica.

Pusaj punzha huasha cutillara yachachishca runauna tandarimunauca. Cungaimanda pungu ishcashca ashcai Jesús Tomaspa ñaupajpi shayarij shamusha casna nica: Rirura sati nisha. Ñuca maquiunara ricui nica. Camba maquira chutachi costillaspi sati, ama mana quirij tucuichu astaumbas quirij tucui.

Chi huasha Tomás cierto pacha quirica. Tomás Jesuspa ñaupajpi cungurisha nica: Ñuca Señor, ñuca Diosmi, nisha.

Jesús paita nica: Can ricushcamandalla quirihuashcangui, astaun mana ricusha quirijguna bendiciashcami anaunga.

Huasha Jesús cuti yachachishcaunama Tiberias nishca lamar patai pactamuca.

Cai tutai Simón Pedro nica: Aichahuara apingaj rauni.

Chibi tiaujpura Pedrora ninauca: Ñucanchis canhua catimuunchi.

Shina nisha canoama sicanauca intiru tuta aichahuara mascanauca randi mana tupanaucachu.

Ña punzhayaushcai Jesús playai ricurimuca randi paiguna Jesús ashcara mana ricsinaucachu. Jesús nica: Runauna, manzhu imaras apicanguichi?

Paiguna ninauca: Mana, cutipasha.

Shinajpi Jesús nica: Shitaichi licara ali partima.

Shina nijpi shina ranauca. Chi huasha mana ushanauca barco ucuma aisanallas ashca aichahua ashcamanda.

Juan Pedrora nica: Señormi an!

Pedro chita uyasha llachapara churarisha canoamanda yacuma saltasha Jesuspajma callpaca, randi paihua cumpañojguna canoai shamunauca. Ashca aichahuara licai aisamunauca. Playai pactamusha nina ahuai shu aichahua tandandi siriuca.

Jesús paigunama nica: Cuna apisha aichahuara chaupira apamuichi.

Pedro licai apishca aichahuara yupaca, patsaj pichca chungu quinsa atun aichahuauna ashallara licara mana pitishca aca.

Jesús paigunara nica: Micuj shamichi.

Micushcai Jesusta ricsinauca. Paigunama tandara paquisha aichahuaras paquisha caraca. Cuna ña quinsa cuti Jesús paihua yachachish-caunama pactamuca pai huañushcamanda cuti causarishca huasha.

Micushca huasha Jesús Simón Pedrora tapuca casna nisha: Simón caigunamanda yali ashcara llaquihuanguichu?

Pedro cutipaca: Ari nisha, can yachangui Señor ñuca canda llaquinimi.

Jesús paita mandaca: Ñuca borrego huahuaunara carangui nica.

(Borrego nijpiga tucui quirijgunami an.)

Ishqui cuti Jesús paita tapuca: Simón Pedro ashcara llaquihuanguichu? nisha.

Simón Pedro: Ari, nica, can yachangui Señor. Ñuca canda llaquinimi.

Jesús paita mandaca: Ñuca borregounara cuirangui nisha.

Jesús quinsa cuti tapuca: Simón, llaquihuanguichu can?

Pedroga Jesús quinsa cuti llaquihuanguichu nisha tapushcamanda llaquiricami. Pai Jesusta cutipaca: Señor, nisha tucuire yachangui, ñuca canda llaquishcara.

Jesús paita mandaca: Ñuca borregounara carangui nisha. Ñucara catihuai.

Jesús cuti paihua yachachishcaunajma shamuca Galilea urcu partii. Jesusta ricusha alabanauca, randi maicanguna chara mana quirinauca.

Jesús paigunara rimasha nica: Tucui ushanara ñucama cuhuashcami ahua pachais cai pachais. Chiraigumanda cangunara mandani: Richi, yachachichi tucui llactaunai ac runaunara. Paigunara bautisaichi Yaya shutii, Churi shutii, Santo Espíritu shutiis. Tucuire ñuca cangunara mandasha yachachishcara paigunama yachachinguichi. Ñuca cangunahua pariju tiaunimi tucui punzhaunai mundu tucurinangama.

Jesús ña ahua pachama sicana uras pactamuca, paiguna Jesusta cai pachai cuti mana ricunachu anauca. Puchucái punzhai Jesús paigunara Olivos urcu nishca Betania llacta mayanai pushaca. Chibi paigunara bendiciaca.

Maspas cai shimira Jesús paigunama cuca casna nisha: Ushaira apinguichimi Santo Espíritu canguna ahuai shamujpi. Santo Espiritura apishca huasha ñucamanda rimajguna anguichimi Jerusalembi, tucui Judeais, Samariais cai pacha intiru munduis.

Cai shimiunara rimashca huasha paiguna ricuujllaira puyu Jesusta quillpaca pai ahua pachama sicaca. Paiguna ahutama Jesús riuji ricuush-cai ishqui runa yuraj churanara churarishca paigunahua pariju shayarinauca.



A5

Chi ishqui yuraj churanara churarishca runauna ninauca: Galileamanda runauna, imarasha ahumalla ricunguichiri? Cai Jesús cuti shamungami canguna caibi ricushcasna shinallarami shamunga.

Shina tucujpi Jesusta catijguna Diosta alabanauca, cushi shunguhua Jerusalen llactama tigranauca. Chibi caran punzha Diosta alabasha mañasha causanauca.

Maicambas Jesús huañushcamanda causarishcara quirisha ahupachama icungaj ushanmi. Maicambas Jesús huañushcamanda causarishcara mana quirisha ahupachama mana icunaungachu astaumbas ucupachama rinaunga.

Shinajpi tucui runaunara nini: Cuna ratullaira aripintichi perdonda mañasha Jesucristora quirichi. Casna rashami huiñai huañaigama causangaj ahupachama icunguichi. Shinallara cai pacha causaibi Diosmanda Jesusmandas Santo Espiritumandas yanapashcara charinguichi.

Shinallara tucui quirijgunama rimauni Jesús canmanda turmindarishcara iyarisha imais pandarishca tiausha uctalla Diosta mañasha alichipangui.

Cierto pacha Jesús ñalla tigramungami.

## CAUSAJ CRISTO TAPUNAUNA

*Panga 57 cai cutipanara tupanguimi.*

1. Tomasta chi susurishcamanda cuintajpi quiricachu?
2. Tomás Jesusta chara mana ricushcai quiricachu?
3. Jesús cuti ricurimushcai imara nica Tomasta?
4. Chi huasha Tomás imara rarca?
5. Tomás Jesusta ricusha quiricachu?
6. Pigunami bendiciashca anaunga nishara nica?
7. Pigunara aichahuara mascanauca?
8. Huasha Jesús maimara pactaca?
9. Ña punzhayaushcai Jesús playai ricurimuca randi paiguna Jesús ashcara mana ricsinaunaca Jesús paigunara imara nica?
10. Jesús imara rangajta mandaca?

*Panga 58 cai cutipanara tupanguimi.*

11. Jesús mandashcara cadzujpi imara tucuca?
12. Ima tupu aichahuara apinauca?
13. Jesús paigunama imarara paquisha cararca?
14. Micushca huasha Jesús Pedrora imasna nishara tapuca?
15. Shina tapujpi Pedro imara cutipaca?
16. Borrego nisha imara nin?
17. Jesús imara mandaca Pedrora?

*Panga 59 cai cutipanara tupanguimi.*

18. Imarasha llaquirica Pedro?
19. Jesús ima tupu ushairara charin?
20. Bautisausha pihua shutii rimanguichi nishara nica?

*Panga 59 cai cutipanara tupanguimi.*

21. Pita quirijgunahua tiaun?
22. Jesús ima urasta quirijgunahua tiaun?
23. Jesús imara mandaca paihua catijgunara?
24. Jesús imara nica Santo Espiritumanda?
25. Jesús cuti shamungachu?
26. Paiguna ahuama ricuushcai angelguna imara ninauca?
27. Jesusta catijguna Jesús ahuapachama sicashca huasha imara ranauca?
28. Shina tucujpi Jesusta catijguna pitara alabanauca?
29. Pita quirishara quishpinanga?
30. Jesús huañushcamanda cuti causarishcara quirisha imara rangaj ushanguí?

*Panga 61 cai cutipanara tupanguimi.*

31. Jesusta mana quirisha maimara rinaunga?
32. Camba uchamanda aripintinguichu?
33. Can Diosta perdonda mañashcanguichu?
34. Can Jesusta quiringuichu?
35. Jesusta quirisha pimanda yanapashcara charingui?
36. Can quirij asha pandarishca tiausha imasna rashara alichingaj ushangui?
37. Shinajpi tucui quirijgunama imarara nin?

Cai cuintaunara Diospa Shimii tupanguimi:

San Mateo 21:1-19; 26:17 - 28:20  
San Marcos 11:1-11, 15-17; 14:12 - 16:20  
San Lucas 19:28-40, 45-48; 22:9 - 24:53  
San Juan 12:12-19; 13:21-38, 18:1-21:25